

Nkolo Yesu akumisama,
Nkembo mpe lokumu ezala ya Ye libela na libela. Amen.

Nazali kolinga tókanisa elongo na bokebi nyonso maloba oyo
Nkolo Yesu alobaki epai ya ntoma na Ye Petelo. Ezali maloba ya
motuya mingi mpo na yo elenge oyo ozali naino na makasi ya
kosala nyonso olingi lelo.

Tótanga:

Yoane 21:18 (Mokanda na Bomoi)

*“Nazali koloba na yo solo: tango ozalaki elenge, ozalaki
komikanga yo moko mpe ozalaki kokende epai olingaki; kasi
tango okokoma mobange, okosembola maboko na yo, mpe
mosusu akokanga yo mpe akomema yo epai olingi te.”*

Maloba oyo esengeli kokanisama malamumu, ezali ya kozwa
malembe te. Awa Nkolo azali kolakisa Petelo ndenge bomoi ya
bolenge epesaka moto bonsomi ya kopona nani akotika amikanga
na ye mpe asalela.

Na bolenge, moto azali na makoki ya kopona:

- akoki komikanga na bomengo ya mbongo,
- akoki komikanga epai ya Nzambe,
- to lisusu komikanga epai ya Satana.

Lelo akoki kopona Nzambe, lobi akoki kopona monguna; nyonso ezali na makasi oyo azali na yango kati na molimo na ye.

Yango nde ekokisaka liloba oyo elobi:

1 Yoane 2:14 (Mokanda na Bomoi)

“Nakomi epai na bino bilenge mpo bozali na makasi mpe bolonga moto mabe.”

Elimboli ete ntango ozali naino na makasi, ozali na nguya ya komikangola to komikanga epai ya nani olingi.

Kasi Nkolo Yesu apesaki Petelo mpe likebisi mosusu:

“MOSUSU akokanga yo mpe akomema yo epai olingi te.”

Osilá komituna moto oyo “mosusu” azali nani?

Mosusu yango akoki kozala Nzambe to Satana.

Elimboli ete ekoya tango moko: soki omipesi na Nzambe te banda sik’oyo, Satana akotia yo na bokonzi na ye na makasi nyonso. Okokoma moto oyo azali na bokangami ya monguna, mpe akosala na yo nyonso alingi.

Soki moto akomi na eteni wana, ekomi mpasi mingi kozonga epai ya Nzambe to ata kososola makambo ya Nzambe, mpo akomi mokangami ya Satana.

Kasi mpe likambo ya ndenge mosusu ezali solo: soki okomi esaleli ya Nzambe tango ozali naino na makasi, ekoya tango oyo makasi ekosila, mpe Nzambe Ye moko akomema yo epai alingi. Wana nde nsuka malamumu ya bomoi, ata soki ezali kufa mpo na litatoli, kasi okobunga lisusu te mpo na libela, mpo Nzambe asilá kokanga yo, mpe Satana akoki lisusu kozwa yo te.

Yango wana Biblia elobi:

Mosakoli 12:1 (Mokanda na Bomoi)

“Kanisa Mozalisi na yo na mikolo ya bolenge na yo, liboso mikolo mabe eya mpe bambula ekóma oyo okoloba: ‘Nazali lisusu na esengo te kati na yango.’”

Elimboli ete soki okanisi Nzambe te lelo, tango ozali na makasi, ekoya tango okobungisa esengo nyonso ya bomoi. Wana nde tango ya kokangama na zabololo mpe komemama epai olingi te.

Talá malamumu: mibange mingi oyo baboyaki Nsango Malamumu banda bolenge, mbala mingi nsuka na bango ezalaka mpasi. Ekómaka mpasi mingi mpo báyamba nsango ya lobiko, mpo “mosusu” asilá kokanga bango.

Yango wana Nkolo Yesu azalaki kokebisa ntoma Petelo kaka te mpo na liwa na ye, kasi mpe mpo na mikano oyo azalaki kozwa na tango wana. Boombo oyo oponi lelo nde ekobatela yo lobi.

Soki oponi Kristo — Kristo akobikisa yo.

Soki oponi Satana — Satana akomema yo epai azali.

Ndeko, mikolo oyo ozali koyoka Nsango Malamu mpe motema na yo ezali koningana, yango nde mikolo ya bolenge na yo. Banda sik'oyo mipesa na bokonzi ya Kristo, tika mokili mpe makambo na yango, mpo bato bakoki kosalisa yo te na mikolo ezali koya.

Banda kobongisa nzela na yo sik'oyo ndenge Biblia eteyi:

Nzembo 119:9 (Mokanda na Bomoi)

“Ndenge nini elenge akoki kobatela nzela na ye peto? Ezali na kotosa Liloba na Yo.”

Kanisa malamumu: ntango etikali moke mpo Nkolo Yesu azonga mbala ya mibale. Soki ozali kokanisa ete Unyakuo ezali naino mosika, kanisa lisusu. Bilembo nyonso ekokisami. Nsango Malamu ya lelo ezali lisusu ya kobondela bato malembe te, kasi ya kokota na Bokonzi na makasi.

Ntango ya kobombamela bosolo esili. Oyo ezali ntango ya suka.

Mokolo nyonso ekoki kozala mokolo parapanda ekobeta.

PARAPANDA EZALI KOBETA!

Nkolo asalisa biso.

Shalom.

Share on:
WhatsApp